

欽定四庫全書

子部

普濟方卷三百

七十九
八十



南京中醫藥大學圖書館版權所有

詳校官太醫院恩糧臣孔毓秀

編修臣倉聖脈覆勘

欽定四庫全書

普濟方卷三百七十九 明

周王朱橚 撰

嬰孩諸疳門

總論

凡兒童二十歲以下其病為疳二十歲以上其病為勞
疳與勞皆氣血憊心腸胃受傷致之同實而異名也疳
之為候頭皮光急毛髮焦稀鼻乾口噤唇白兩眼昏爛
揉鼻擗眉脊聳體黃闔牙咬舌焦渴自汗尿白瀉酸肚

脹腸鳴癖結潮熱酷嗜瓜果鹹炭生米泥土而飲水吐
飯者其候也 心疳即驚疳由乳食不調心臟受熱所
致也蓋其血氣未定乳哺有傷易生壅滯內有滯熱未
得疏通故心神驚鬱而作驚疳之候外證身體壯熱臉
赤唇紅口舌生瘡胸膈煩悶小便赤澀五心皆熱盜汗
發渴齧齒虛驚是謂心疳 肝疳即風疳由乳食不調
肝臟受熱所致也若乳母寒暄不調滋味不節或外感
風寒內傷喜怒邪氣未徹遽爾乳兒多成風疳風入眼

腫翳生眵涕是謂疳眼外證搖頭揉目白膜遮睛眼青
淚多頭焦髮立筋青腦熱甲痒筋攣躁渴汗多下痢瘡
癰是謂肝疳 腎疳即急疳由乳食不調臟腑伏熱所
致也凡甘味入於脾而動蟲蟲動則掃蝕臟腑遂使孩
提心下擾悶若上蝕齒斷則口瘡出血齒色紫黑下蝕
腸胃則下利肛爛濕痒生瘡療治不蚤肌體消耗難以
有瘳蟲者蠶也目為濕蠶多因疳傷久痢腸胃受濕得
之狀如孤感傷寒齒蝕之證或以走馬命名蓋齒屬腎

主筋纔受熱邪疳氣直奔上焦故以走蝕為喻初作口
氣名曰臭口次第齒黑名曰崩砂盛則斷爛名曰潰槽
熱血迸出名曰宣露甚者齒皆脫落名曰腐根其根既
腐縱得全活齒不復生外證腦熱肌削手足如冰寒熱
時來滑泄肚痛口臭乾渴齒斷生瘡爪黑面鰲身多瘡
疥是謂腎疳 肺疳即氣疳由乳食不調壅熱傷肺所
致也肺主乎氣鼻乃肺氣所通其氣不和則風濕乘
虛客於皮毛入於血脉故鼻下兩傍赤痒瘡濕是為鼻

疳瘡鼻不通汁所流處即成瘡亦名疳蠱外證欬嗽喘
逆壯熱惡寒皮膚粟生鼻痒流涕咽喉不利頤爛唾紅
氣脹毛焦泄利頻併是謂肺疳 脾疳即肥疳由乳食不
節脾胃受傷所致也或乳母恣食生冷肥膩或乳兒過
飽或飯後與乳致使吐乳多脹久則變為乳癖腹脇結
塊亦名妳疳外證面黃身瘦肚大脚細吐逆中滿乏力
哭啼水穀不消泄下酸臭合面困睡減食喫泥是謂脾
疳 析而論之曰五疳出蟲曰蛔疳曰脊疳曰腦疳曰

乾疳曰疳渴曰疳瀉曰疳腫脹曰疳勞曰無辜疳曰丁奚
曰哺露證狀非一五疳出蟲者疳傷之源雖起於乳哺
不調然臟腑停積已久莫不化而為蟲或如絲髮或如
馬尾多有此積者皆於頭項腹背之間黃白或赤者可
醫青黑則難療也蛔疳者失乳飯食肉太早或腸胃停
蓄甜膩化為蛔蟲皺眉多啼嘔吐清沫腹中乍痛肚脹
青筋唇口紫黑癆頭齒痒是也蛔雖食蟲不可動從口
鼻出者難治脊疳者蟲蝕脊膂身弱羸黃積中生熱煩

溫下痢拍背如鼓鳴脊骨如鋸齒或十指皆瘡頻嚙爪
甲是也腦疳者胎中素挾風熱生下乳哺越常頭皮光
急滿頭迸瘡腦如火髮結如穗徧身多汗顙腫顙高是
也乾疳者聲焦皮燥大便乾結其病在肺搭伏癡眠腦
腕乾渴其病在脾總為乾疳是也疳渴者臟中風有疳
氣加乳母恣食五辛酒麵炙煨使小兒心腹壅熱日則
煩渴引飲乳食不進夜則渴止是也疳瀉者毛枯唇白額
上青紋肚脹腹鳴瀉下糟粕是也勿用熱藥止之疳痢

者挾受風寒暑濕冷熱不調或停積宿滯水穀不聚頻下惡物是也疝腫脹者虛中有積其毒與濕交并故令腹肚緊脹由是脾復受濕故令頭面脚手虛浮是也法當磨積調氣疝勞者潮熱往來五心煩熱手足心及腦前熱而發瘡盜汗骨蒸嗽喘枯悴是也或渴而復瀉飲水惡食肚硬如石面色如銀斷不可活無辜疝者腦後項邊有核如彈子按之轉動軟而不疼其間有蟲如米粉不速破之則蟲隨熱氣流散淫蝕臟腑以致肢體癱

瘡便利膿血壯熱羸瘦頭露骨高是也針刺破膏藥貼
上或濯兒衣露於簷下為鴻鳥落羽所污兒着此衣蟲
入皮毛亦致無辜之疾兒衣已曬須微火烘之其若手
足極細小骨高尻削體痿腹大臍突號哭腦陷或生瘡
癥是為丁奚虛熱來往頭骨分開翻食吐蟲煩渴嘔噦
是為哺露皆因脾胃久虛不能化水穀以榮血氣故肌
肉消鑠腎氣不足復為風冷所傷使柴骨枯露亦有胎
中受毒臟腑少血致之皆無辜種之疾病而至此不幾

殆哉又有小兒久患腎疳內虛不食甚者天柱倒治法
當用錢氏地黃丸加驅疳等劑仍與貼項強筋不識證
謂之五軟非也天柱骨倒凡有三種有吐瀉日久羸弱
成者有肝膽伏熱面赤唇紅忽變此者有傷寒不及發
表或者更被風邪入肝以致筋絡放弛吐瀉者當調胃
氣肝熱者隨輕重以涼肝並與強筋貼項惟傷寒天柱
骨倒者難療聖惠方云凡小兒疳在諸腹脹痢色無常或如內脹日漸羸瘦此可療若鼻下赤爛
自揉其鼻頭上有瘡噴痂痛痒其漸可治泔涎流引達
於兩耳時時目赤頭髮稀疎腦皮光緊頭大項小肌體

羸瘦亦可治也若唇口被蝕齒斷作五色或盡峭黑舌下有白瘡上齧有竅子下痢時有臭氣齒斷漸軟欲爛不可治也若下部開張有時亦爛痒不可忍脊骨如鋸無完不可治也若疳蝕脊臂十指背痒自咬指甲髮豎作穗有時腹脹有時下痢若急治之無不瘥也凡小兒肝臟疳若睛帶青脉左脇下硬多吐涎沫眼角左右有黑氣聚腫不可治也心與脾疳若受驚啼好飲水更食辛味臉有脉舌上有靨者不可治皮枯臟乾若肚大唇無血色人中平陷下痢無度水穀不消好吃泥土骨露不可治也

凡小兒疳大約有冷熱二種熱疳之病常見於外五心煩熱掀衣氣麤飲冷水煩躁卧地肚熱脚冷潮熱往來皆熱疳也冷疳病多在內痢色無常其吻青白肢體

軟弱目腫面顰又一證燥渴卧地似有熱狀而飲食不
進滑瀉無已亦冷疳也其有瀉多膿血日加瘦弱此則
謂之冷積大抵疳之受氣皆虛使然熱者虛中之熱冷
者虛中之冷治熱不可妄表過涼治冷不可峻溫驟補
故錢氏又曰小兒易為虛實脾胃虛不受寒溫服寒則
生冷服溫則生熱當識此而勿誤上醫處此消積和胃
滋血調氣隨順藥餌以扶之淡薄飲食以養之榮衛調
和臟腑自然充實取積之法又當權衡積者疳之母由

積而虛謂之疳極諸有積者無不肚熱脚冷須酌量虛實而取之若積虛而甚則先與扶胃使胃氣內充然後為之微利若積勝於虛則先與利道設得一泄急以和胃之劑為之扶虛然取積宜疎利如白豆蔻蘿蔔子縮砂蓬朮消疾等般亦不可無脇間癖痛亦虛中之積聚也先寒後熱飲水不食或飲水以致喘嗽錢氏有癖為潮熱之治法解散寒熱即與下癖合是而觀發作不同療治不一又可無權度於此哉若夫諸疳惡證心疳

飲水不已食則驚啼耳邊紋多舌上黯黑者不治肝疳
右脇結硬頻數吐涎目睛青筋眼角黑氣者不治腎疳
飲水好醎小便如乳耳焦肩聳牙黑骨枯者不治肺
疳欬逆氣促頻瀉白沫身上粟生其色斑黑者不治脾
疳喫泥泄痢水穀不消唇白腹高人中滿者不治其或
滑泄不休脫肛咳逆抱起昏沉手足垂軟足及脚心全
不知覺項筋舒展身體變冷是則為五絕證候甚者胸
陷嘔噦乳食直瀉腫滿不痢腹脇脹疼皮發紫瘡肌肉

光紫與夫疳勞渴瀉面槁色瘦骨露齒脹肚不食者皆危篤矣凡疳在內目腫腹脹利色無常或沫青白漸瘦弱此冷證也疳在外鼻下赤爛自揉鼻頭上有瘡不痛痂漸破鼻瘡遠耳此熱證也宜蘭香散白粉散主之肝疳當補肝地黃丸主之心疳當補心定神丸主之脾疳當補脾益黃散主之腎疳當補腎地黃丸主之肺疳當補肺益黃散主之筋疳瀉血而瘦當補肝地黃丸主之疳喜卧冷地當補腎地黃散主之諸疳皆當補其母及